

## Resolución número 60

**Asunto:** A perda de *-r-* en o grupo *pr-* en posición inicial.

### Testo d'a resolución

En a fabla charrata se rechistran formas como, por exemplo, *poblema* en cuenta de *problema*, *pogreso* en cuenta de *progreso*, *pograma* en cuenta de *programa*, ezetra. A recomendación ye no almitir ixas formas en una escritura correuta e formal, por considerar que se trata de preunzias zercustanzials, que bella bez se sienten en a fabla charrata de carácter familiar, pero que no parixe combenién reproducir en a escritura, ni muito menos cheneralizar.

### Chustificación

Ye una reyalización bulgar rezién, que antiparti se da tamién en a preunzia bulgar en castellano, por o que no se puede considerar un rasgo propio de l'aragonés. Antiparti, ba cuenta ra tendencia chenuina de l'aragonés de conserbación de os grupos iniciais de consonán oclusiba más bibrán: *probar~prebar*, *prebatina*, *probeyer*, *promenar*, *promanar*, *prou*, igual como *cremar*, *crebar*. Se da en cultismos probeniens d'o griego, pero ampratos en tiempos muito amanatos ta nusatros, cuasi siempre á trabiés d'o castellano. Por tanto, o consellable ye escribir as formas con a *-r-*: *problema* (e deribatos: *problemativa*, *problemativo*), *programa* (e deribatos: *programación*), *progreso*, *progresar* (e deribatos: *progresivo*, *progresión*). E como consecuencia, refusar formas tals como *\*pograma*, *\*pogreso*, ezetra.

Ye almisible ixa perda de *-r-* en o grupo *-pr-* en silaba interior, e más que más prezedita d'un prefixo. Asinas: *apolargar*, *empezipiar*, *propio* < lat. PROPRIUS (e deribatos e formas d'a mesma familia lesica: *apropio*, *apropiar*, *apropiación*, *propietario*, *espropiar*, *espropiación*, *impropio*, ez., asinas como a esprisión alberbial de *propio*), que resuelve una cacofonía e ye amplamén espardita en as luengas romanicas.